

“TASDIQLAYMAN”

**“O‘zbekiston temir yo‘llari” AJ
boshqaruv raisi v.b.**



Z.G' Narzullaev

**“Quyuv mexanika zavodi” aksiyadorlik jamiyati
USTAVI**

2023-yil

“TASDIQLANGAN”

“Quyuv mexanika zavodi” aksiyadorlik jamiyati
USTAVI

I bo‘lim. Umumiy qoidalar

1. “Quyuv mexanika zavodi” sho‘ba korxonasi O‘zbekiston Respublikasi Prezidentining 2023-yil 10-oktyabrdagi “O‘zbekiston Respublikasi temir yo‘l transporti sohasini tubdan isloh qilish chora-tadbirlari to‘g‘risida”gi 329-sonli qarori hamda “O‘zbekiston temir yo‘llari” AJ boshqaruvi raisining 2023-yil 8-noyabrdagi 882-N-sonli buyrug‘iga muvofiq “Quyuv mexanika zavodi” aksiyadorlik jamiyati (keyingi o‘rinlarda-Jamiyat) sifatida qayta tashkil etilgan. Jamiyat “Quyuv mexanika zavodi” sho‘ba korxonasining hisobidagi barcha huquq, mavjud mol-mulk, pul mablag‘lari va boshqa moliyaviy resurslar, va majburiyatlarning huquqiy vorisi hisoblanadi.

2. O‘zbekiston Respublikasining “Aksiyadorlik jamiyatlari va aksiyadorlarning huquqlarini himoya qilish to‘g‘risida”gi Qonuniga muvofiq, Jamiyatning huquqiy holati aksiyadorlik jamiyati hisoblanadi.

Jamiyat tijorat tashkiloti hisoblanadi.

3. Jamiyatni tashkil etish, faoliyat yuritishi, qayta tashkil etilishi va tugatilishi bilan bog‘liq munosabatlar O‘zbekiston Respublikasining “Aksiyadorlik jamiyatlari va aksiyadorlar huquqlarini himoya qilish to‘g‘risida”gi Qonuni, “Temir yo‘l transporti to‘g‘risida”gi Qonuni va O‘zbekiston Respublikasining boshqa qonun hujjatlari bilan tartibga solinadi.

4. Jamiyatning nomi:

4.1. To‘liq nomi:

- o‘zbek tilida: “Quyuv mexanika zavodi” aksiyadorlik jamiyati, kirill harflarida “Quyuv mexanika zavodi” акциядорлик жамияти;

- rus tilida: Акционерное общество «Quyuv mexanika zavodi»;

- ingliz tilida: “Quyuv mexanika zavodi” Joint stock company.

4.2. Qisqartirilgan nomi:

- o‘zbek tilida: “QMZ” AJ;

- rus tilida: АО « QMZ»;

- ingliz tilida: “QMZ” JSC.

II bo‘lim. Yuridik maqomi

2.1. Jamiyat yuridik shaxs hisoblanadi, o‘zining mustaqil balansida aks ettiriladigan alohida mulkka, shu jumladan o‘zining ustav fondiga (kapitaliga) berilgan mol-mulkka, bank muassasalarida hisob raqamlariga, jumladan valyuta hisob raqamlariga, korxonaga logotipi tushirilgan dumaloq muhrga, davlat tilida yozilgan emblema (logotip) va shtamplarga ega.

2.2. Jamiyat qonunchilikda belgilangan tartibda korxonalar, tashkilot va muassasalar, jumladan filiallar hamda vakolatxonalar tashkil etishi mumkin.

2.3. Jamiyat o'z faoliyatini amalga oshirishda, O'zbekiston Respublikasi Konstitutsiyasi, O'zbekiston Respublikasi qonunlariga, Oliy Majlis palatalari qarorlariga, O'zbekiston Respublikasi Prezidentining farmonlari, qarorlari va farmoyishlariga, O'zbekiston Respublikasi Vazirlar Mahkamasining qarorlari va farmoyishlariga hamda Jamiyat yagona aksiyadorining qarori va mazkur Ustavga amal qiladi.

2.4. Mazkur Ustav bilan tartibga solinmagan huquqiy munosabatlar O'zbekiston Respublikasining boshqa qonunchilik va me'yoriy-huquqiy hujjatlari bilan tartibga solinadi.

2.5. Jamiyat davlat ro'yhatidan o'tkazilgan paytdan e'tiboran yuridik shaxs maqomiga ega bo'ladi.

2.6. Jamiyat o'z majburiyatlari yuzasidan o'ziga tegishli barcha mol-mulk bilan javobgar bo'ladi.

2.7. Jamiyat o'z aksiyadorlarining majburiyatlari yuzasidan javobgar bo'lmaydi.

2.8. Jamiyat davlat va uning organlari majburiyatlari yuzasidan javobgar bo'lmaydi, xuddi shuningdek davlat va uning organlari ham Jamiyat majburiyatlari yuzasidan javobgar bo'lmaydi.

2.9. Jamiyatning joylashgan yeri va pochta manzili: O'zbekiston Respublikasi, Toshkent shahar, Bektemir tumani, X.Bayqaro ko'chasi, 41, indeksi 100182.

2.10. Jamiyatning elektron pochta manzili: e-mail: qmz@mail.ru

2.11. Jamiyatning rasmiy veb-sayti: www.lmz.uz

2.12. Jamiyatning faoliyat muddati chegaralanmagan.

III bo'lim. Jamiyatning asosiy vazifalari

3.1. Jamiyat faoliyatining asosiy maqsadi daromad olish va moddiy ahvolni, mehnat jamoasi a'zolarining ijtimoiy-maishiy sharoitini, O'zbekiston Respublikasi iqtisodiyotining rivojlanishini yaxshilash.

3.2. O'z faoliyatining maqsadiga erishish uchun jamiyat quyidagilarni amalga oshiradi:

- yuk vagonlarini ishlab chiqarish va sotish;
- yuk vagonlarini ta'mirlash, modernizatsiya qilish va xizmat muddatini uzaytirish;
- yuk vagonlarining kafolatli foydalanish muddatini ta'minlaydigan ehtiyot qismlarni ishlab chiqarish;
- yuk vagonlarini qurish hajmini oshirish;
- ehtiyot qismlar assortimentini kengaytirish;
- import o'rnini bosuvchi mahsulotlarni mahalliyashtirish;
- aholiga va korxonalarga maishiy, kommunal, transport va oldi-sotdi savdo xizmatlarini ko'rsatish;
- moddiy-texnika ta'minoti yetkazib berilishini yaxshilash;
- korxonaning ishlab chiqarish sexlari va uchastkalarini rekonstruksiya qilish va texnik qayta jihozlash;
- xodimlarni tayyorlash, qayta tayyorlash va malakasini oshirish;
- sanoat ekologiyasini yaxshilash;

- barcha turdagi transport vositalari uchun standart va nostandart uskunalarni loyihalashtirish va ishlab chiqarish hamda sotish;
- xodimlarning xavfsiz va avariyasiz ishlashlarini ta'minlash uchun mehnat sharoitlarini yaxshilash;
- harakatlanuvchi tarkib va uning ehtiyot qismlarini sinovlarini o'tkazish;
- mahsulotlar majmuini kengaytirish bilan tayyor mahsulot sotish hajmini oshirish;
- mahsulotni eksport qilish hisobiga sotish bozorini kengaytirish;
- temir yo'l infratuzilmasi va harakat tarkibida foydalaniladigan butlovchi va ehtiyot qismlarini loyihalashtirish, ishlab chiqarish va sotish;
- ishlab chiqarilayotgan mahsulotlar uchun me'yoriy-texnik hujjatlarni ishlab chiqarish;
- vagon detallari va butlovchi qismlarini sinovlarini o'tkazish;
- qurilish ob'ektlarida metall qurilmalarini tayyorlash va o'rnatish;
- yuk ko'tarish mashinalari va mexanizmlarini ishlab chiqarish;
- halq iste'moli mollari ishlab chiqarishni kengaytirish va aholiga pullik xizmatlar ko'rsatish.
- qurilish, montaj, qurilish-ta'mirlash, restavratsiya va boshqa pudrat ishlarini amalga oshirish;
- ilg'or texnologiyalarni ishlab chiqarishga joriy etish;
- turli xil sanoat ishlab chiqarish chiqindilarini, ikkilamchi xom ashyoni yig'ish, qayta ishlash va tayyor mahsulotlar shaklida sotish;
- ikkilamchi qora va rangli metal chiqindilarini yig'ish, qayta ishlash va sotish;
- tovar-moddiy boyliklarni bozor tovar aylanmasiga yarmarkalar, auksion savdolari orqali jalb qilish;
- pullik ta'lim kurslarini tashkil etish;
- ko'rgazmalar, auksionlar va taqdimotlar, reklama kompaniyalarini o'tkazishni tashkil qilish;
- tijorat do'konlarini tashkil qilish va ulardan foydalanish;
- tashqi iqtisodiy faoliyatni amalga oshirish;
- qishloq xo'jaligi, hayvonlar va parrandachilik mahsulotlarini saqlash, tashish hamda sotish;
- atrof muhitni muhofaza qilish va ekologik toza texnologiyalarni joriy qilish yuzasidan tadbirlarni amalga oshirish;
- import o'rnini ta'minlagan holda ta'mirlash-foydalanish ehtiyojlari uchun ehtiyot qismlar, uzellar, detallar, uskunalarni ishlab chiqarishni rivojlantirish;
- umumiy ovqatlanishni tashkil qilish;
- loyiha-smeta hujjatlarini tuzish;
- kimyoviy tozalash xizmatlarini ko'rsatish;
- tijorat do'konlarini tashkil qilish va ulardan foydalanish;
- tijorat va savdo, shuningdek ulgurchi savdo faoliyatini amalga oshirish.

3.3. Jamiyat qonunga xilof bo'lmagan faoliyatning boshqa turlari bilan shug'ullanishga haqli.

3.4. Jamiyat maxsus ruxsat (litsenziya) talab qilinadigan faoliyatni amalga oshirishga haqli, ushbu faoliyatni tegishli maxsus ruxsatnoma (litsenziya) olgandan keyin amalga oshiriladi.

IV bo'lim. Jamiyatning ustav fondi (kapitali).
Uni ko'paytirish yoki kamaytirish tartibi. Jamiyatning aksiyalari,
obligatsiyalari va boshqa qimmatli qog'ozlari

4.1. Sho'ba korxonasi negizida tashkil etilgan "Quyuv mexanika zavodi" aksiyadorlik jamiyati qayta tashkil etish paytigacha sho'ba korxonasiga tegishli bo'lgan mavjud mulk, pul mablag'lari va boshqa moliyaviy resurslar, shuningdek qarzlarning to'liq huquqiy vorisi hisoblanadi.

4.2. Jamiyat ustav fondining (kapitalining) dastlabki miqdori Jamiyat yagona aksiyadorining qarori asosida belgilangan.

4.3. Jamiyat ustav fondi miqdori 8 184 285 000 (sakkiz milliard bir yuz sakson to'rt million ikki yuz sakson besh ming) so'm bo'lib, 8 184 285 (sakkiz million bir yuz sakson to'rt ming ikki yuz sakson besh) dona oddiy aksiyalarga bo'lingan.

4.4. Jamiyat ustav kapitali taqsimlanmagan foyda va ustav kapitali hisobidan shakllantirildi.

4.5. Oddiy aksiyaning nominal qiymati 1 000 (bir ming) so'mni tashkil etadi.

4.6. Jamiyat ustav fondi (kapitali) qo'shimcha aksiyalar joylashtirish yo'li bilan ko'paytirilishi mumkin.

4.7. Jamiyat ustav fondini (kapitalini) ko'paytirish (aksiyalarni joylashtirish narxini belgilash, aksiyalar emissiyasi risolasi va ularni chiqarish) va bu to'g'rida mazkur ustavga tegishli o'zgartirish kiritish haqidagi qarorni Jamiyat aksiyadori qabul qiladi.

4.8. Qo'shimcha ravishda chiqarilgan aksiyalar uni chiqarish to'g'risidagi qarorda belgilangan, lekin davlat ro'yxatidan o'tkazilgan paytdan e'tiboran bir yildan ortiq bo'lmagan muddatda joylashtirilishi lozim.

4.9. E'lon qilingan aksiyalarning umumiy soni doirasida chiqarishda va joylashtirishda aksiyalarning sotib olingan qismi Jamiyat ustav fondiga (kapitaliga) o'tkaziladi.

4.10. Jamiyatning ustav fondi (kapitali) aksiyalarning nominal qiymatini kamaytirish yoki aksiyalarning umumiy sonini qisqartirish yo'li bilan, shu jumladan, aksiyalarning bir qismini keyinchalik bekor qilgan holda Jamiyat tomonidan aksiyalarni olish yo'li bilan kamaytirilishi mumkin.

4.11. Jamiyat ustav fondini (kapitalini) kamaytirish va Jamiyat Ustaviga tegishli o'zgartirish kiritish to'g'risidagi qaror Jamiyat aksiyadori tomonidan qabul qilinadi.

4.12. Jamiyatda ustav fondining (kapitalining) 15 foizi miqdorida zaxira fondi tashkil etiladi.

4.13. Jamiyatning zaxira fondi har yili sof foydadan yillik majburiy to'lovlar ajratish yo'li bilan ustav fondining (kapitalining) 25 foiziga yetmagungacha shakllantirib boriladi.

4.14. Zaxira fondiga ajratmalarning yillik hajmi Jamiyatning yil yakuniga ko'ra sof foydasining 15 foizidan kam bo'lmasligi lozim.

4.15. Jamiyatning zaxira fondidan qonun hujjatlarida belgilangan tartibda foydalaniladi.

4.16. Jamiyat Kengashining qaroriga binoan boshqa fondlar ham tashkil etilishi mumkin.

4.17. Jamiyat ustav fondini (kapitalini) oshirish uchun oddiy, e'lon qilingan nominal qiymati 1000 so'm bo'lgan 81 842 850 dona –umumiy qiymati 81 842 850 000 so'mga qo'shimcha aksiyalarni joylashtirish huquqiga ega.

V bo'lim. Jamiyatning huquqlari

5.1. Jamiyat Ustavda belgilangan vazifa va funksiyalarini bajarish maqsadida quyidagi huquqlarga ega:

O'zbekiston Respublikasi iqtisodiyoti va aholisi ehtiyojlaridan kelib chiqqan holda davlat buyurtmalari va bevosita shartnomalar (kontraktlar) asosida sotiladigan maxsulot, ishlar va xizmatlar hajmini mustaqil ravishda belgilash;

o'z nomidan mulkiy va shaxsiy nomulkiy huquqlarga egalik qilish va ularni amalga oshirish, zimmasiga majburiyatlar olish, sudda da'vogar va javobgar bo'lish;

belgilangan tartibda bo'linmalar, markazlar, firmalar, korxonalar, filiallar, vakolatxonalar, qo'shma korxonalar tashkil etish, turli respublikadagi va xalqaro tashkilotlar va birlashmalarga a'zo bo'lish;

qonunchilikda belgilangan tartibda aksiya va boshqa qimmatli qog'ozlarini chiqarish va joylashtirish, shuningdek O'zbekiston Respublikasi hududida va undan tashqarida aksiyadorlik jamiyatlarining aksiyalari va boshqa qimmatli qog'ozlarini sotib olish.

VI bo'lim. Jamiyat faoliyatini boshqarish

6.1. Jamiyatning aksiyadori, kuzatuv kengashi va ijro etuvchi organi Jamiyatning boshqaruv organlaridir.

6.2. "Aksiyadorlik jamiyatlari va aksiyadorlarning huquqlarini himoya qilish to'g'risida"gi O'zbekiston Respublikasi Qonunining 58-moddasiga muvofiq, Jamiyatda aksiyadorning umumiy yig'ilishi vakolatiga kiritilgan masalalar bo'yicha qarorlar Jamiyatning yagona aksiyadori tomonidan yakka tartibda qabul qilinadi, hamda yozma shaklda rasmiylashtiriladi. Jamiyatda aksiyadorning umumiy yig'ilishi o'tkazilmaydi.

6.3. Jamiyatning Kengashi (keyingi o'rinlarda Kengash deb ataladi) 7 kishidan iborat.

6.4. Jamiyat Boshqaruvi Jamiyatning ijro etuvchi organi hisoblanadi, u 7 kishidan iborat.

6.5. Jamiyat Boshqaruvi raisi qonunchilikda belgilangan tartibda tanlov asosida tayinlanadi.

6.6. Jamiyat Boshqaruvi a'zolari qonunchilikda belgilangan tartibda tayinlanadi.

VII bo'lim. Jamiyat boshqaruv organlari

7.1. Jamiyatning boshqaruv organlari quyidagilar:

- Jamiyatning aksiyadori- boshqaruvning oliy organi;
- Kuzatuv Kengashi - Jamiyat faoliyati umumiy boshqaruvini amalga oshirish organi;
- Kollegial ijroiya organini (Boshqaruv) - Jamiyatning kundalik faoliyatiga rahbarlikni amalga oshirish organi.

VIII bo'lim. Jamiyat aksiyadorining vakolatlari

8.1. Jamiyatning aksiyadori Qonun hamda mazkur Ustavga muvofiq huquqlarga ega.

8.2. Jamiyat aksiyadorining vakolatlariga quyidagilar kiradi:

Jamiyat ustaviga o'zgartirish va qo'shimchalar kiritish;

Jamiyat ustav fondini (ustav kapitalini) oshirish, kamaytirish va e'lon qilingan aksiyalar sonini kamaytirish;

Jamiyatning yangi tahrirdagi ustavini tasdiqlash;

Jamiyatni qayta tashkil etish;
Jamiyatni tugatish, tugatuvchini (tugatish komissiyasini) tayinlash, hamda oraliq va yakuniy tugatish balanslarini tasdiqlash;
e'lon qilingan aksiyalarning eng ko'p miqdorini belgilash;
Jamiyatning o'z aksiyalarini olish;
Jamiyatning tashkiliy tuzilmasini tasdiqlash;
Jamiyatning moliya-xo'jalik faoliyatini nazorat qilish uchun 3 kishidan iborat taftish komissiyasi a'zolarini saylash va ularning vakolatlarini muddatidan oldin tugatish, shuningdek taftish komissiyasi to'g'risidagi nizomni tasdiqlash;
Jamiyatning yillik hisobotini, shuningdek jamiyat faoliyatining asosiy yo'nalishlari va maqsadidan kelib chiqqan holda jamiyatni o'rta muddatga va uzoq muddatga rivojlantirishning aniq muddatlari belgilangan strategiyasini tasdiqlash;
Jamiyatning foydasi va zararlarini taqsimlash;
majburiy auditorlik tekshiruvini o'tkazish to'g'risida va uning xizmatlariga to'lanadigan haqning eng ko'p miqdorini belgilash haqida qaror qabul qilish;
Jamiyat Kengashi va taftish komissiyasining o'z vakolat doirasiga kiradigan masalalar yuzasidan, shu jumladan jamiyatni boshqarishga doir qonun hujjatlarida belgilangan talablarga rioya etilishi yuzasidan jamiyat kuzatuv kengashining hisobotlarini va taftish komissiyasining xulosalarini eshitish;
Jamiyat boshqaruv va nazorat organlari bildirgilari (hisobotlari) shakl va tarkibiga talablarni belgilash;
Jamiyat tomonidan aksiyalar, korporativ obligatsiyalar, shu jumladan aksiyalarga ayirboshlanadigan obligatsiyalar chiqarish to'g'risida qaror qabul qilish;
qimmatli qog'ozlarning hosilalarini chiqarish to'g'risida qaror qabul qilish;
Jamiyatning korporativ obligatsiyalarini qaytarib sotib olish to'g'risida qaror qabul qilish;
"Aksiyadorlik jamiyatlari va aksiyadorlarning huquqlarini himoya qilish to'g'risida"gi O'zbekiston Respublikasi Qonunining 34-moddasiga muvofiq aksiyalarni joylashtirish (qimmatli qog'ozlarning birja bozoriga va uyushgan birjadan tashqari bozoriga chiqarish) narxini belgilash;
Jamiyat aksiyalarni maydalash va yiriklashtirish;
"Aksiyadorlik jamiyatlari va aksiyadorlarning huquqlarini himoya qilish to'g'risida"gi O'zbekiston Respublikasi Qonunining 8 va 9-boblarida nazarda tutilgan holatlarda Jamiyat tomonidan bitimlar tuzish to'g'risida qaror qabul qilish;
Kengash tavsiyasi asosida dividendlarni miqdori, to'lash shakli va tartibi bo'yicha qaror qabul qilish;
qonun hujjatlariga muvofiq boshqa masalalarni Jamiyatni aksiyadori vakolatlari doirasida hal etish.

IX bo'lim. Jamiyatning kuzatuv kengashi

9.1. Jamiyatning Kuzatuv kengashi vakolatiga quyidagilar kiradi:

Jamiyatning Kuzatuv Kengashi faoliyati tartibi tasdiqlangan qonun hujjatlari va mazkur Ustav hamda jamiyat Aksiyadori tomonidan tasdiqlangan "Jamiyatning Kuzatuv Kengashi to'g'risidagi Nizomi" orqali belgilanadi

mol-mulkning bozor qiymatini belgilashni tashkil etish;

Jamiyatning yillik biznes-rejasini tasdiqlash. Bunda Jamiyatning kelgusi yilga mo'ljallangan biznes-rejasi Jamiyat Kengashi majlisida joriy yilning 1-dekabridan kechiktirmay ma'qullanishi lozim;

ichki audit xizmatini tashkil etish va uning xodimlarini tayinlash, shuningdek har chorakda uning hisobotlarini eshitib borish;

Jamiyat ijro etuvchi organining faoliyatiga daxldor har qanday hujjatlardan belgilangan tartibda erkin foydalanish va Jamiyat Kengashiga yuklangan vazifalarni bajarish uchun ushbu hujjatlarni ijro etuvchi organdan olish. Jamiyat Kengashi va uning a'zolari olingan hujjatlardan faqat xizmat maqsadlarida foydalanishi mumkin;

Jamiyat biznes rejasida belgilangan maqsadlarga erishishni monitoring qilish;
Korporativ boshqaruv kodeksi bajarilishini nazorat qilish;

Jamiyatning taftish komissiyasi a'zolariga to'lanadigan haq va kompensatsiyalarning miqdorlari yuzasidan tavsiyalar berish;

Jamiyatning ijroiya organiga to'lanadigan haq va (yoki) kompensatsiyalarni, shuningdek ularning eng yukori miqdorlarini belgilash;

Jamiyatning aksiyadoriga dividend miqdori, uni to'lash shakli va tartibi yuzasidan tavsiyalar berish;

Jamiyatning zaxira va boshqa fondlaridan foydalanish;

Jamiyatning filiallarini tashkil etish va vakolatxonalarini ochish;

Jamiyatning sho'ba va tobe xo'jalik jamiyatlarini tashkil etish;

"Aksiyadorlik jamiyatlari va aksiyadorlarning huquqlarini himoya qilish to'g'risida"gi O'zbekiston Respublikasi Qonunining 8 va 9-boblarida nazarda tutilgan holatlarda bitimlar tuzish haqida qaror qabul qilish;

Jamiyatning tijorat va notijorat tashkilotlardagi ishtiroki bilan bog'liq bitimlarni qonun hujjatlarida belgilangan tartibda tuzish.

9.2. Jamiyat Kengashi faoliyatining tartibi Jamiyat Kengashi to'g'risidagi Nizomda belgilanadi. Jamiyat ustaviga taftish komissiyasi, Kengash va Boshqaruv a'zolari soni o'zgarishi bilan bog'liq o'zgartirishlar Kengash yig'ilishini o'tkazmasdan aksiyador tomonidan kiritiladi.

9.3. Jamiyat Kengashining vakolati doirasiga kiritilgan masalalar Jamiyat Boshqaruviga hal etish uchun berilishi mumkin emas.

9.4. Jamiyat Kengashi qarorlari, qonunchilikda va mazkur Ustavda boshqacha qoida belgilanmagan bo'lsa, oddiy ko'pchilik ovoz bilan qabul qilinadi.

9.5. Jamiyat Kengashining yig'ilishlari har chorakda kamida bir marta o'tkaziladi.

9.6. Jamiyat Kengashining qarorlari sirdan ovoz berish yo'li bilan (so'rov yo'li bilan) Jamiyat Kengashining barcha a'zolari tomonidan bir ovozdan qabul qilinishi mumkin.

9.7. Jamiyat Kengashi raisi Kengash tomonidan qaror qabul qilish paytida, agar ovozlar soni teng bo'lib qolsa, hal qiluvchi ovozga ega bo'ladi.

X bo'lim. Jamiyat Boshqaruvi

10.1. Jamiyatning joriy faoliyatiga rahbarlik Jamiyatning kollegial ijro etuvchi organi Boshqaruv tomonidan amalga oshiriladi.

10.2. Jamiyat Boshqaruvi vakolatiga quyidagilar kiradi:

Jamiyat faoliyatining asosiy yo'nalishlari loyihasini ishlab chiqish;

Jamiyatning biznes-rejasini ishlab chiqish;

Jamiyat mulkini amaldagi qonunchilikka muvofiq boshqarish;

Jamiyat aksiyador yoki ulushdor sifatida ishtirok etuvchi yuridik shaxslar ustav fondiga qo'shimcha hissa qo'shish, ushbu yuridik shaxslar ustav fondidagi ulushini oshirish yoki kamaytirish, ularning tarkibidan chiqish to'g'risida qaror qabul qilish;

O'zbekiston Respublikasi Prezidentining yoki Vazirlar Mahkamasining qarori yoki topshirig'iga muvofiq, Jamiyatning tijorat va notijorat tashkilotlardagi ishtiroki bilan bog'liq bitimlarni tuzish;

Jamiyat Ustaviga o'zgartish va qo'shimchalar kiritish bo'yicha takliflar ishlab chiqish;

Jamiyat xodimlari mehnatiga haq to'lash shakllari, tizimlari va miqdorlarini tasdiqlash, shuningdek xodimlarni xo'jalik faoliyati yakunlariga ko'ra rag'batlantirish to'g'risidagi takliflarni ko'rib chiqish va tasdiqlash.

10.3. Jamiyat Boshqaruvi raisi ishlab chiqarish, moliyaviy va boshqa turdagi Jamiyat aksiyadori, Kengashi vakolatiga kirmaydigan faoliyatiga oid masalalar bo'yicha qarorlar qabul qiladi.

XI bo'lim. Jamiyat Boshqaruvi raisi

11.1. Jamiyat Boshqaruvi raisi:

Jamiyat faoliyatiga rahbarlik qiladi, Jamiyatga yuklangan vazifalarning bajarilishi, hamda mazkur Ustavga rioya qilinishi yuzasidan shaxsan javobgar hisoblanadi;

Boshqaruv a'zolari o'rtasida vazifalarni taqsimlaydi;

Jamiyat faoliyatiga oid masalalarni hal etishda ularning vakolatlarini belgilaydi;

Jamiyat aksiyadori, Kengashi va Boshqaruvi qarorlarining ijro etilishi yuzasidan nazoratni ta'minlaydi;

Jamiyat mablag'larini belgilangan tartibda, ishonchnomasiz tasarruf etadi, banklarda hisob va boshqa raqamlar ochadi, Jamiyatning hisob-kitob hujjatlari va hisobotlarini imzolaydi, O'zbekiston Respublikasi davlat organlari va boshqa yuridik va jismoniy shaxslari bilan, hamda undan tashqaridagi munosabatlarda Jamiyat nomidan ish yuritadi, Jamiyat nomidan kelishuvlar, shartnomalar, kontraktlar va boshqa bitimlar tuzadi, bunday bitimlarni amalga oshirish uchun ishonchnomalar beradi;

Jamiyat aksiyadori va Kengashiga ko'rib chiqish uchun Jamiyat vakolati doirasiga kiradigan masalalar yuzasidan hujjatlar loyihalarini belgilangan tartibda kiritadi;

Jamiyatning barcha mansabdor shaxslari va xodimlari bajarishi shart bo'lgan buyruqlar, farmoyishlar, ko'rsatmalar chiqaradi, shuningdek o'zining vakolati doirasiga kiruvchi masalalarga oid yo'riqnomalarni va boshqa hujjatlarni tasdiqlaydi;

Jamiyatni rivojlanishi uchun zarur miqdordagi foyda olish choralari ko'radi;

Jamiyat tarkibiga kiruvchi sex va bo'lim rahbarlarini belgilangan tartibda tayinlaydi;

Jamiyatning xodimlari lavozimlari nomenklaturasini tasdiqlaydi va unga muvofiq ularni ishga qabul qilish, ish joyini o'zgartirish, boshqa ishga o'tkazish, hamda mehnat shartnomalarini bekor qilishni amalga oshiradi;

Jamiyat xodimlariga nisbatan amaldagi qonunchilikda va Jamiyat xodimlarining intizomi haqidagi nizomda nazarda tutilgan intizomiy jazo choralari qo'llaydi;

xodimlarni mukofotlash to'g'risidagi nizomni tasdiqlaydi, lavozim bo'yicha ish haqlarini, ularga ustamalarni, turli qo'shimcha to'lovlarni belgilaydi, Jamiyat xodimlarini rag'batlantiradi, shuningdek, Jamiyat xodimlarini ijtimoiy himoyalash maqsadida kompensatsiya to'lovlari joriy etadi;

Jamiyat ishchilarini ijtimoiy kafolat, mehnat muhofazasi va sanoat xafvsizligiga rioya qilinishini ta'minlaydi;

Jamiyatning moliyaviy-xo'jalik faoliyati holati uchun mas'ul hisoblanadi, hamda Jamiyatning moliyaviy barqarorlikni ta'minlashga yo'naltirilgan zarur choralarni ko'radi;

Jamiyat tomonidan amaldagi qonunchilik, maxalliy va me'yoriy xujjatlarga rioya etilishini ta'minlaydi.

XII bo'lim. Jamiyatning mulki, vositalari va sarmoyalari

12.1. Jamiyatning mulkiga egalik qilish, foydalanish, tasarruf etish ob'ektlari bo'la oladigan moddiy ob'ektlar, shu jumladan pul mablag'lari, qimmatli qog'ozlar, ulushlar (paylar, hissalar) hamda nomoddiy ob'ektlaridan iborat bo'ladi.

12.2. Jamiyat o'zining mustaqil balansida hisobga olinadigan alohida mulkiga ega bo'ladi. Jamiyat o'z nomidan mulkiy va shaxsiy nomulkiy huquqlarga egalik qilishi va ularni amalga oshirishi, majburiyatlar bo'yicha javob berishi, sudda da'vogar va javobgar sifatida ishtirok etishi mumkin.

12.3. Jamiyat mulki quyidagi manbalar hisobidan shakllanadi:

mahsulotlarni sotishdan, ish va xizmat ko'rsatishdan, shuningdek xo'jalik faoliyatining boshqa turlaridan olinadigan daromadlar;

sotib olingan qimmatbaho qog'ozlardan tushgan daromadlar;

ustav kapitalida ulushga ega bo'lgan nodavlat mulkchilik shaklidagi sub'ektlar foydasidan, shuningdek dividendlar tarzida olinadigan daromadlar;

O'zbekiston Respublikasi qonunchiligi tomonidan taqiqlanmagan boshqa manbalar.

12.4. Jamiyat o'z tasarrufidagi bo'lgan mulk va mablag'lardan o'z manfaatlarini ko'zlab foydalanadi. Belgilangan tartibda qurishi, qayta tiklashi, sotib olishi, ko'chma va ko'chmas mulkni xarid qilishi, olishi, ijaraga olishi va berishi (ijaraga berilayotgan mulkning ijara haqi yuz foiz miqdorida ushbu mulkni balansida saqlovchi korxonaning hisob raqamiga tushadi), hamda qonun xujjatlariga zid bo'lmagan boshqa faoliyatlarni amalga oshirishi mumkin. Ko'chmas mulk toifasiga kiradigan asosiy vositalarni sotish (hisobdan chiqarish) faqatgina Jamiyatning yagona aksiyadori hamda Jamiyat kuzatuv kengashining qarori asosida amalga oshiriladi.

12.5. Jamiyat faoliyati natijalari bo'yicha olingan foyda (daromad), soliqlar va byudjetga to'lanadigan boshqa to'lovlar amalga oshirilgandan so'ng, Jamiyat aksiyadori qaroriga muvofiq taqsimlanadi.

XIII bo'lim. Jamiyatda hujjatlarni saqlash

13.1. Jamiyat:

belgilangan tartibda ro'yxatga olingan Ustavini, Jamiyatning tuzilishi va qayta tashkil etilishiga doir hujjatlarni, Jamiyatning davlat ro'yxatiga olinishi haqidagi guvohnomani;

o'z balansida bo'lgan mulkka egalik huquqini tasdiqlovchi hujjatlarni;

tarkibiga kiruvchi korxonalar va bo'linmalar, Jamiyat filiallari va vakolatxonalari haqidagi nizomlarni;

aksiyador, Kengash va Boshqaruv majlislarining bayonnomalarini, shuningdek Jamiyat Boshqaruvining buyruq va farmoyishlarini;